

Utekeru, Athamani, 13-9-84, Page 7.

Salim aendelea kuhimiza kilimo

Waziri Mkuu, Ndugu Salim Ahmed Salim amewataka Watanzania wote wanaoishi kwenye mikoa iliyo na ardhi yenye rutuba na mvua za kutosha kutumia uwezo wao wote kuzalisha mazao ya chakula na biashara kwa wingi, ili kuondoa uhaba wa chakula nchini na kuliongeza taifa uwezo wa kupata fedha za kigeni.

Alisema kuwa njia ya kuondoa umaskini ambao unalikabtili taifa na wananchi wake ni kuzidisha uzalishaji wa mazao ya chakula na biashara.

Waziri Mkuu alikuwa akihutubia mkutano wa hadhara mjini Liwale jana akiwa katika ziara ya siku-tano

mkoani Lindi ambayo inamalizika leo.

Alisema katika ziara yake mkoani Lindi amedna maeneo makubwa ya ardhi yenye rutuba ambayo, kama yangetumika kikamilifu, mkoa huo ungekuwa miongoni mwa mikoa inayozalisha mazao mengi ya chakula na biashara.

Akifafanua kuhusu suala la fedha za kigeni, ambalo limekuwa likiwatatanisha watu wengi, alisema, fedha za kigeni sio kitu cha ajabu ambacho kipo hewani, bali maana yake ni uwezo wa taifa kuuza mazao yake nchi za nje.

Waziri Mkuu alisema mazao

yanayouzwa nje ndiyo yanayolijwezesha taifa kubadilishana na bidhaa muhimu kutoka nje zinazohitajika kwa ajili ya mipango ya maendeleo na miradi mbalimbali ikiwemo ujenzi wa barabara ya Kibiti-Lindi ambayo inahitaji kiasi kikubwa cha fedha za kigeni.

Mapema Waziri Mkuu alitembelea duka la ushirika linalomilikiwa na chama cha walaji cha mjini Liwale na pia alikagua mradi wa ng'ombe wa kijiji cha Makata ambacho kwa upande wa ufugaji kimefikia hatua ya mwanzo kuwa na ng'ombe 84.

Kuhusu ujenzi wa shule za sekondari, zinazojengwa kila wilaya chini ya mpango wa taifa, kwa

kupanua elimu ya sekondari, Waziri Mkuu aliwapongeza Watanzania kwa kutambua umuhimu wa shule hizo na kuweza kushiriki kikamilifu katika ujenzi wake kwa njia ya kujitolea.

Vijiji na mashirika ya umma wilayani Liwale vilimkabidhi Waziri Mkuu mchango wa jumla ya sh. 62,403 kwa ajili ya ujenzi wa shule hiyo ambayo tayari wananchi wamefyatua jumla ya matofali 550,000 katika kipindi cha majuma sita.

Leo Waziri Mkuu atakwenda Nachingwea ambako atazungumza na viongozi wa Chama na Serikali wa mkoa wa Lindi kabla ya kurejea Dar es Salaam.